



ANG


**Bayan**

Pahayagan ng Partido Komunista ng Pilipinas  
Pinapatnubayan ng Marxismo-Leninismo-Maoismo

Ispesyal na Isyu  
Marso 29, 2003  
[www.philippinerevolution.org](http://www.philippinerevolution.org)

# Pataason ang lebel sang inaway banwa kag angkunon ang tanan-nga-bahin nga mga pagsulong

Ni Armando Liwanag  
Tsirman, Komite Sentral,  
Partido Komunista ng Pilipinas



**L**ubos ang kalipay ginasaulog naton ang pagkatukod sa Bag-ong Hangaway sang Banwa (BHB) sang Partido Komunista sang Pilipinas trenta'y kwatro ka tuig ang nagligad sadtong Marso 29, 1969.

Kami, ang Komite Sentral sang Partido, nagasaludo sa tanan nga mga Pulang kumander kag hangaway. Kamo matutom kag maisog nga mga rebolusyonaryo kag ginatamyaw namon kamo tanan sa inyo mga kadalag-an bilang isa ka pwersang pang-away, pangpropaganda, pang-organisa kag pangproduksyon.

Nakaamot kamo sang daku sa pangkabilugan nga kadalag-an sang Ikaduha nga Dungganon nga Kahublagan Pagpanadlong sugod nga ginlunsar ini sang 1992.

Nagaani kamo sang nagabanaag nga mga kadalag-an sa pagpatuman sang inyo mga tulungdan sa tatlo-ka-tuig nga plano sang 1992 tubtub 2002.

Ang inyo mga kadalag-an amo ang bunga sang malig-on ninyo nga panindugan sa rebolusyonaryong kawsa, matutom nga pagtrabaho kag wala kakapoy nga paghimakas kag sa paghatag sang mataas nga importansya sa pagsakripisyo sang kaugalingon sa idalum sang husto nga pagpamuno sang Partido kag sa aktibong partisipasyon kag suporta sang pumuluyo.

Pasidunggan naton ang aton mga rebolusyonaryong martir kag mga nagpanaw nga baganihan. Himuon naton nga inspirasyon ang ila di makinaugalingon kag mga sakripisyo. Liwat naton papagsikon ang rebolusyonaryong panimuot nga magbatu sang mas makahason para sa pungsodnon kag mga demokratikong kinamatarung kag interes sang pumuluyong Pilipino.

Ginatublag sang grabe nga krisis ang imperyalismong US kag ang papet nga rehimeng Arroyo kag bangud sini nanging bangkarote, desperado kag mas labing mapanghimulos kag mapiguson sangsa nagtaliwan. Ginapatuman nila ang polisiya nga todo gera batuk sa mga rebolusyonaryong pwersa kag sa pumuluyo kag pakalainon ang mga ini bilang mga "terorista".

Ang sabat naton amo ang pagpataas sa lebel sang aton inaway banwa kag angkunon ang tanan-nga-bahin nga mga pagsulong sa kabilugan nga rebolusyonaryong paghimakas para sa pungsodnon nga kahilwayan kag demokrasya batuk sa imperyalismo kag sa mga lokal nga nagaharing sahi sang mga dalagku nga kumprador kag agalon nga mayduta.

## **1. PAGTASA SA KUSOG SANG BHB**

Sa Plenum sang Komite Sentral sang Partido Komunista sang Pilipinas sadtong 2002, ginsuma kag gin-analisa ang pag-uswag sang BHB sugod ginlunsar ang Ikaduha nga Dungganon nga Kahublagan Pagpanadlong. Tanan-nga-bahin nga naangkon ang daku kadalag-an, ilabi na sa proseso sang pagpatuman sang Tatlo ka Tuig nga Plano sang 1999 tubtub 2002. Nalatag ang malig-on nga basehan para dal-on ang inaway banwa sa isa ka bag-o kag mas mataas nga lebel kag para angkunon ang mas dalagku nga pagsulong sa tanan-nga-bahin nga paagi.

Bilang rebolusyonaryong partido sang proletaryado, ginapamuan sang PKP ang BHB. Nakapabakod ini sa ideolohiya, pulitika kag organisasyon paagi sa Ikaduha nga Dungganon nga

---

### **Base sa superyor nga kusog militar sini, ang kaaway nagalunsar sang estratehikong opensiba militar, nagtinguha palibutan ang BHB...Ugaling ang problema sang kaaway amo nga ginakangil-aran sila sang pumuluyo...**

---



---

Kahublagan Pagpanadlong kag wala kakapoy nga rebolusyonaryong paghimakas.

Malig-on kag maathag nga nailatag ang pangkabilugan nga linya sang bag-o nga demokratikong rebolusyon paagi sa malawigan nga inaway banwa batuk sa dumuluong nga monopolyong kapitalismo, lokal nga pyudalismo kag burukrata kapitalismo.

Lubos naton nga ginsaway kag ginsikway ang mga "Wala" kag Tuo nga oportunistang linya nga nag-uk-ok sa BHB sadtong dekada 1980 kag temprano nga bahin sang dekada 1990 kag nagpamahog nga waskon ang Partido kag bug-os nga rebolusyonaryong hublag asta sa paglunsar sang Ikaduha nga Dungganon nga Kahublagan Pagpanadlong. Napaslaw naton ang pinakamaitom nga mga paghingabot sang kaaway nga waskon ang rebolusyonaryong hublag halin sa sulod.

Nasaksihan naton ang dalayon nga pagkadunot kag pagsamad sang mga rebisyunistang traidor

kag indi magbag-o nga mga oportunista nga naghayag na bilang mga espesyal nga ahente sang imperyalismong US kag lokal nga mga reaksyunaryo, indi lang bilang mga antikomunista nga propagandista kundi mga ahente sang paniktik kag mga armadong kombatant sa pila ka kaso.

Napalig-on naton ang alyansa sang mamumugon kag mangunguma bilang pundasyon sang aton rebolusyon. Kumbinasyon ini sang nagapanguna nga sahi kag mayor nga pwersa sang rebolusyon. Ginaisa sini ang anakbalhas nga nagabug-os sang masobra 90 porsyento sang pumuluyong Pilipino.

Ginatalana ang rebolusyonaryo nga makasahing linya sang estratehikong linya sang malawigan nga inaway banwa kag ginasiguro sini ang kadalag-an sang bag-o nga demokratikong rebolusyon paagi sa huluhintang nga pagpauswag sa hangaway sang banwa sa malawig nga sakup sang panahon.

Bunga sang sining estratehikong linya, ang hangaway sang banwa nakatipon sang kusog sa kaumhan, pangunahon sa kubay sang masang mangunguma, tubtub maangkon na ang mga rebolusyonaryong pwersa kag ang pumuluyo sang ikasarang kag matuga na nila ang kahimtangan nga agawon ang gahum pangpulitika sa kaaway nga nakabase-sa-syudad. Bunga sang linya nga ini, napaabante naton ang paglubad sang problema sa duta kag ginapatuman ang demokratikong kaundan sang rebolusyon. Bunga sini, napalapad kag nakonsolida naton ang baseng masa paagi sa pagtukod sang mga organisasyong masa kag mga organo sang gahum pangpulitika.

Nakatipon ang BHB sang armadong kusog paagi sa paglunsar sang maikit kag malaparan nga inaway gerilya base sa nagapadalom kag nagapalapad nga baseng masa. Lubos naton nga ginapauswag subong ang temprano nga bahin sang estratehikong depensiba. Naabot naton ang desaysibo nga kadamuon sang mga Pulang hangaway agud makasulong pakadto sa nahanunga nga halintang sang estratehikong depensiba.

Ang BHB may linibo-libo nga mga Pulang kumander kag hangaway nga maayo nga nahanas kag natilawan-sa-inaway, nga may linibo-libo nga mga awtomatikong riple kag iban pa nga mataas nga kalibreng armas. Kada tuig nagadaku ang numero sang mga Pulang hangaway sang 10 tuhtub 15 porsyento halin 1999 tuhtub 2001, mas mataas sangsa sa daan nga tuigan nga tantos nga 8 tuhtub 9 porsyento.

Nagdamo man sang 11 tuhtub 16 porsyento ang aton mataas nga kalibreng riple halin 1999 tuhtub 2001, mas mataas sangsa daan nga tuigan nga tantos sang 7.1 porsyento. Bisan sa signipikanteng pagdugang sang aton mga armas, mas madamo gihapon ang mga Pulang hangaway sangsa magamit nga mga riple (3 : 2). Daku ini nga kakulang sa mga armas ikumparar sa numero sang mga nahanas nga hangaway, luwas pa ang mas daku nga mga reserbang pwersa.

Nagadugang sa mga lubos-panahon nga hangaway ang mga milisya sang pumuluyo nga naserbi bilang rebolusyonaryong pulis kag reserbang pwersa sa kabaryuhanan, kag sang mga yunit sang depensa-sa-kaugalingon nga ginabug-os sang tanan nga may ikasarang nga lalaki kag babaye sa mga organisasyong masa.

May aton subong 128 prenteng gerilya nga nagasakup sang mas o menos 8000 baryo kag signipikante nga bahin sang mas o menos 700 tuhtub 800 banwa kag syudad sa masobra 90 porsyento sang mga prubinsya sa bilog nga pungsod. Sa kinaandan, sakup sang isa ka prenteng gerilya ang 12 baryo sa kada banwa.

Singkwenta porsyento sang mga prenteng gerilya ang may kabilugang pwersa nga tig-isa ka kumpanya sang BHB kag ang nabilin nga singkwenta porsyento manubo sa isa ka kumpanya. Kadam-an sa napulo'g lima ka rehiyon nga gintukod sang Partido may kinaandan nga indi magnubo sa anum ka prenteng gerilya nga ang kada isa may kusog-kumpanyang pwersa sang BHB.

Sadtong 2001, nagpili ang kaaway sang 12 prenteng gerilya bilang nasyunal nga prayoridad nga target para sa mga malawigan nga kampanya sang pagtapna, nga




---

**Angkon sang BHB ang kusog para hingalitan ang bentaha sang nagagrabe nga krisis sang pangkalibutan nga sistemang kapitalista kag lokal nga naghaharing sistema kag pataason ang lebel sang inaway banwa kag agumon ang tanan-nga-bahin nga mga pagsulong sa bago nga demokratikong rebolusyon.**

---

ginakinaiyahan sang paglikup sa kada prenteng gerilya gamit ang daku nga pwersa sang kaaway kag ginapasulod sa mga baryo ang mga *special operations team* para sa saywar kag paniktik, kag amo man bilang tim sa mga sa pagpamatay-pangawat-kag-panunog.

Base sa superyor nga kusog militar sini, ang kaaway nagalunsar sang estratehikong opensiba militar, nagtinguha palibutan ang BHB kag "pangitaon kag wasakon" ini ukon, "hawanan, kaptan, konsolidahon kag pauswagon" ang pila ka pili nga erya. Ugaling ang problema sang kaaway amo nga ginakangil-aran sila sang pumuluyo bilang mga instrumento sang mga imperyalista kag sang mga mapanghimulos nga sahi kag ginahimo sila nga buta kag bungol kon angot sa BHB.

Dugang pa, nakapauswag na ang BHB sang madamu-damo nga prenteng gerilya. Mahimo nga konsentran sang kaaway ang 12 sang mga ini pero mapabayaan man nga bukas nga pauswagon ang masobra 100 prenteng gerilya. Kon desidido ang militar nga konsentran kag sakupon ang anuman nga erya, ginabayaan anay naton ini sa isa ka panahon kag magsaylo sa iban nga erya. Sa sini, makalunsar kita sang mga taktikal nga opensiba sa eksteryor nga linya sang kaaway.

Nagpabilin sa mas o menos 128 ang isip sang mga prenteng gerilya sa sulod sang duha tuhtub tatlo ka tuig pangunahon bangud sa paghatag tum-ok sa hilikuton konsolidasyon kag indi bangud sa epektibidad sang kampanya sa pagtapna sang kaaway. Sa kamatuoran, pagkatapos sang kada kampanya sang pagtapna sang kaaway, amo na lamang ang kaakig sang pumuluyo sa natuga nga mga paglapas sa tawhanon nga kinamatarung gani nagabaskog pa

sangsa nagtaliwan ang handum nga mag-entra sa armadong rebolusyon.

Ginabug-os sang mga organisasyong masa sang mga mamumugon, mangunguma, kababaihan, kabataan, mga aktibista pangkultura kag mga bata ang pinakasolido nga baseng masa sang mga prenteng gerilya. May ginatos ka libo ang mga katapu sang nadsambit nga mga organisasyong masa. Nagdamo sila sang kinaandan nga 19.4 porsyento kada tuig sa panahon sang 1999 tuhtub 2001.

Ang populasyon sa idalum sang nagaluntad nga mga organo sang gahum pangpulitika ang nagabug-os sang ginpalapad nga baseng masa nga nagaabot sa pila ka milyon. Ang mga indi pa katapu sang mga organisasyong masa nagahatag sang nanuhay-tuhay nga porma sang suporta sa hangaway sang pumuluyo. Napahulag sila sa mga aksyong masa.

Relatibong balansyado ang pagkalatag sa bilog nga pungsod sang mga prenteng gerilya. Singkwenta porsyento sang mga ini ang sa Luzon, 20 porsyento sa Visayas kag 30 porsyento sa Mindanao. Ang kada rehiyunal nga kumand sang BHB may pito ka prenteng gerilya sa kinaandan.

Natural lang nga indi palareho ang pag-uswag sang mga rehiyunal nga kumand kag mga prenteng gerilya sang BHB sa halambalanon sang armadong kusog, nalab-ot sang reporma sa duta kag kadakuon kag kalidad sang baseng masa. Gintumod sang Partido kon ano nga mga prenteng gerilya ang pinakamauswagon, indi pa mauswagon kag manubo ang lebel sang pag-uswag sa katuyuan nga buligan ang mga nagakaulihi agud makalagas sa mas mauswagon kag mapataas ang

---

**Ang pang-ekonomya kag pangpinansya nga krisis nga lunsay ginabatyag subong sang tatlo ka sentro sang pangkalibutan nga kapitalismo (ang US, Japan kag European Union) nagatuga sang pinakareaksiyunaryo nga mga huyog pareho sang pasismo, rasismo kag mga agresibong gera.**



---

kabilugan nga pag-uswag sa isa ka bag-o kag mas mataas nga halintang.

Bilang mayor nga organisasyon sang Partido, ang BHB ang may pinakamataas nga konsentrasyon sang mga katapu sang Partido. Ini ang mayor nga organisasyon para sa hugot nga pag-angot sa pinakadamo nga numero sang mga anakbalhas. Ini ang pinakagamhanan nga armas sang Partido kag pumuluyo sa pag-agaw sang gahum pangpulitika.

Pangunahon nagahalin sa alyansa sang mamumugon kag mangunguma ang kusog sang BHB.

Dugang pa, nagakuha man sang kusog ang BHB halin sa mga alyansa sang mga progresibong pwersa, mga patriyotikong pwersa kag pakipag-alyansa sa mga mahuyang kag di-masaligan nga alyado sa pinakamalapad nga tipo sang alyansa agud ihamulag kag lutuson ang kaaway sa kada natalana nga panahon.

Angkon sang BHB ang kusog para hingalitan ang bentaha sang nagagrabe nga krisis sang pangkalibutanon nga sistemang kapitalista kag lokal nga nagaharing sistema kag pataason ang lebel sang inaway banwa kag agumon ang tanan-nga-bahin nga mga pagsulong sa bago nga demokratikong rebolusyon.

## **2. KRISIS SANG U.S. KAG PANGKALIBUTANON NGA SISTEMANG KAPITALISTA**

Ginapahambog sang US kag mga Pilipino nga reaksiyunaryo nga idu-idu sini nga walay pulos para sa pumuluyong Pilipino kag rebolusyonaryong pwersa nga magbatu sa ila bangud ang US kuno ang solohanon nga *superpower*, nga asta subong pinakamabaskog nga gahum pang-ekonomya kag militar. Wala pa kuno sang pwersa sa kalibutan nga makatapna sa kon ano ang gusto niya himuon.

Sa kamatuoran, garuk sa pinakaubod ang imperyalismong US. Bug-os ang kumpanya sang pumuluyong Pilipino kag mga rebolusyonaryong pwersa nga batuan nila ini bangud nalab-ot na sini ang pinakamadalom kag pinakamalala nga krisis sa ekonomya kag pinansya kutob matapos ang Ikaduha nga Gera Pangkalibutanon kag bangud nahamulag na ini bunga sang imperyalista kag teroristang polisiya sang agresyon kag pagpamigos.

Sa mga imperyalistang pungsod, ang US amo ang labing nakabenepisyo sa globalisasyon sang "hilway nga merkado". Tulod sang mataas nga interes kag ganansya diri, nakaganyat ang US sang dumuluong nga pamuhunan sa mga sapi, bono kag iban pa nga propyedad halin sa mga



imperyalistang alyado sini kag mga pungsod nga nagaprodukto sang langis. Gingamit sini ang mga dumuluong nga pundo agud gastuhan ang konsumerismo, pinagusto nga ispekulasyon sa pagpagguwa sang sapi kag pagtingub sang mga korporasyon, pamuhunan sa luwas kag produksyon militar.

Ginapabugal sang US nga ang "bag-ong ekonomya" sini padayon nagadaku nga wala sang dis-employo pero wala nagataas ang sweldo bangud kuno sa pagpanguna sang US sa mataas nga teknolohiya kag, labaw sa tanan, bangud sa pagpugong sa sweldo kag pagbuhin sa gastos para sa serbisyo sosyal<sup>1</sup>. Sa kamatuoran, ang ekonomya sang US artipisyal nga ginapalutaw sang mga pangguwa nga utang.

Gilayon pagkatapos sang pagtimbuok sang "bag-o nga ekonomya" sadtong 2000, gulpe ini nga nagtibusok tuig-tuig. Sugod sadto, yara sa malawigan nga pag-us-os ang *stock market* (ukon balaligyaan sang mga sapi) kag nagwasak ini sang masobra US\$ 8 trilyones. Madasig nga nagtibusok ang produksyon industriyal kag nagtuluhaw ang dalagku nga mga anomalya sa mga sapi, bono kag pautang sang mga korporasyon. Ang hingalit nga gamay nga paghabok ginsundan sang malawig pa nga pagtibusok.

Bangkrap kon usisaon ang ekonomya sang US. May iya utang publiko nga US\$ 6.4 trilyones kag neto nga utang sa luwas nga 2.8 trilyones. Wala untat nga nagadaku ang depisit sini sa baligyaanay. Ang sarplus sini sa badyet sa idalum ni Clinton naubos na kag ginbuslan sang dalagku nga mga depisit sa badyet sa idalum sang rehimeng Bush. Nagasalig ang rehimen nga kuhaon ang mga

pundo para sa seguro pangkati-lingban, bisan nasipot na ang mga pundo pangpensyon kag mga sinuptan personal, nga gingamit bilang kolateral sa pagbakal sang mga sapi sa paagi nga *on margin*<sup>2</sup> sang masobra 40 porsyento sang mga pamilyang Amerikano.

Sa amo pa man, ang administrasyon ni Bush nagahatag sa monopolyong burgesya sang dalagku nga pagbuhin sa buhis nga nagabalor sang US\$ 2.65 trilyones sa sulod sang napulo ka tuig, naggasto sang US\$ 400 bilyones sa militar para sa paglunsar sang duha ka gerang agresyon nga nagasulunod; kag nagapamahog gerahon ang Syria, Iran kag ang Democratic People's Republic of Korea.

Ginhingalitan sang rehimeng Bush ang pagpautwas sang simpatiya sang pumuluyo sa bilog nga kalibutan para sa mga pamilya sang mga biktima kag sa pumuluyong Amerikano pagkatapos sang Septyembre 11 nga mga atake kag gilayon gingamit nga tapalan ang mga atake agud magpamahog ukon maglunsar sang teroristang gera batuk sa mga

gubyrno nga nagapanindugan sa ila independensya kag batuk sa mga kahublagan sang pungsodnon nga kahilwayan.

Sa ngalan sang kontra-terorismo, ang rehimeng Bush hungod nga nagadabuk sang isterya sang gera, nagaduso sang pasismo kag pagpamigos sa pangkalibutanon nga sakup kag aktwal nagahimo sang interbensyon militar, pareho sa Pilipinas, kag nagalunsar sang mga gerang agresyon, pareho sa Afghanistan kag Iraq, agud papagsikon ang produksyon panggera kag mang-agaw sang mga resorsa kag mga ruta sang suplay sang langis.

Bangud malapit nga koneksyon sini sa *military industrial complex* kag mga monopolyo sang langis, nagapati ang nagahari nga rehimeng Bush nga sa pagpabor sa sining mga sektor magaanar indi lamang ang ekonomya sang US kundi amo man ang bug-os nga pangkalibutanon nga sistemang kapitalismo.

Pero ang pagpabuy-on sa mga sektor nga ini wala nakapatuhaw sang empleyo nga bastante sa pagpadaku sa *consumer demand*<sup>3</sup> angot sa krisis sang sobra nga produksyon sa US kag sa pangkalibutanon nga sistemang kapitalismo.

Ang pang-ekonomya kag pangpinansya nga krisis nga lunsay ginabatyag subong sang tatlo ka sentro sang pangkalibutanon nga kapitalismo (ang US, Japan kag European Union) nagatuga sang pinakareaksyunaryo nga mga huyog pareho sang pasismo, rasismo, kag mga agresibong gera. Ang monopolyong burgesya nagagamit sang pinakareaksyunaryo nga mga argumento agud ibasol ang krisis sa mga pumuluyo nga indi kabahin



**Nagabangon ang mga  
mamumugon kag mga pigos  
nga pumuluyo sa kalibutan  
sa mga dalagku nga  
aksyong masa agud  
iprotesta ang imperyalista  
nga gerang agresyon sang  
US batuk sa Iraq.**

sang kaliwat sang puti kag nagduso nga pataason ang lebel sang mga huyog nga pasista, rasista kag mapanggera.

Ang US amo ang numero uno nga imperyalistang gahum. Ginaduso ini sang krisis nga mang-agaw sang dugang nga mga teritoryo pang-ekonomya (mga malakolonya kag mga pungsod nga dependyente) kag gamiton ang mga ini bilang resorsa sang mga hilaw nga materyales, patag sang pamuhunan, merkado, *salient points of control*<sup>4</sup>, kag mga sakup sang impluwensya.

Ang US amo ang numero uno nga teroristang gahum. Ini ang pinakadaku nga manug-obra, manugtipon kag manuggamit sang nukleyar, kemikal kag bayolohikal nga *weapons of mass destruction* ukon mga hinganiban para sa madamuan nga pagpanamad. Ini lamang ang may gahum nga naggamit sang mga bomba atomika agud ubuson ang populasyon sang mga syudad, pareho sa Hiroshima kag Nagasaki. Naggamit ini sang mga kemikal agud patyon kag pabudlayan ang bilog nga mga komunidad kag hiluan ang kapalibutan pareho sa Indochina. Pataratas ini nga nagagamit sang nanari-saring makakulugmat nga mga hinganiban pareho sang mga *cluster bomb*<sup>5</sup>, *smart bomb*<sup>6</sup>, mga bomba nga may *depleted uranium*<sup>7</sup>, kag iban pa batuk sa mga di-militar nga target, nga nagatuga sang lapnagon nga pagkamatay, pagkapilas, pagbalatian kag kasamaran.

Nagpatay na ini sang masobra 10 milyones katawo sa mga gerang agresyon sugod matapos ang Ikaduha nga Gera Pangkalibutanon, pareho sang Korean War (4.5 milyones nga mga Koreano), sa Vietnam War (6

---

**Ang pumuluyong Pilipino  
kag mga rebolusyonaryong  
pwersa wala natiplang  
sa mga promisa sang US kag  
sang mga Pilipino nga idu-  
idu sini...Wala man  
makugmat ang pumuluyong  
Pilipino kag mga  
rebolusyonaryong pwersa  
sa gahum teknolohikal  
kag militar sang  
imperyalismong US.**

---



milyones nga mga Vietnamese) kag sa una nga gerang agresyon batuk sa Iraq (150,000). Nangsulsol ini sang antikomunista nga mga masaker, pareho sa pagpamatay sang 1.5 milyones nga Indonesian sadtong 1965. Nagtuga ini sang mga gera nga *fratricidal*<sup>8</sup>, nga pumatay sang masobra isa ka milyon katawo pareho sa Rwanda kag ginatos-gatos ka linibo pareho sa Congo kag sa anay Yugoslavia.

Paagi sa mga *embargo*<sup>9</sup>, gintuga sang US ang pagkamatay sang 1.5 milyones nga Iraqi kag mas o menos 750,000 nga bata. Pinakamalaut sa tanan, bisan waay sang maathag nga kalakasan pisikal, nagatuga ang US sang adlaw-adlaw nga kalakasan sang neokolonyal nga pagpanghimulos sa binilyon nga pumuluyo halin sa isa ka henerasyon pakadto sa masunod.

Sa subong nga gerang agresyon batuk sa Iraq, saksi kita sa pagpangbiktima sang gintawag

nga mga pwersang koalisyon sa kadam-an nga pumuluyong Iraqi kag nagasilut sa gubyernong Iraqi bangud nagapanindugan sa iya pungsodnon nga kahilwayan. Sa amo man, nakit-an naton ang daku nga litik sa alyansa sang mga imperyalistang gahum, kon sa diin maathag sa isa ka bahin ang US kag Britain kag sa pihak naman nga bahin ang France, Germany kag Russia.

Bisan sa kabilugan nagaisa sila batuk sa pumuluyo sang kalibutan kag batuk sa mga kahublagan rebolusyonaryo, ang mga imperyalistang gahum ginaduso sang krisis sang pangkalibutanon nga sistemang kapitalismo nga magkumpetensya sang mas masingki sangsa nagtaliwan kag nagakaakig sa walay tupong nga kadalok sang nagasolohanon nga *superpower* sa paghakup sang pinakadaku nga bahin sa ginpamuyungan.

Sadtong una nga gerang agresyon batuk sa Iraq, ginpapas-an sang US sa mga alyado sini ang kadam-an nga gastos sa gera. Pero ginkuripon sini ang kadam-an sang mga pinamuyungan halin sa gera sang mag-imposar sang mga pangmilitar kag iban pa nga kontrata sa mga pungsod nga nagaprodukto sang langis, paghugot sang kontrol sa suplay sang langis pakadto sa Japan, Europe kag iban pa nga bahin sang kalibutan kag pagpwersa sa Palestine Liberation Organization Front nga magduko sa Zionistang padihot sang dominasyon sang US kag Israel sa Palestine kag sa Middle East.

Naghimbunanay ang US kag Europe agud sistematiko nga bungkagon ang anay Yugoslavia. Pero ang US ang naghugakum sang pinakadamo nga benepisyo paagi sa pagpalapad sa NATO sigun sa estratehikong plano sang US kag

pagpugong sa mas makini nga alagyan sang langis padulong sa Central kag Western Europe nga maagi sa Russia ukon sa mga suba sang Danube kag Rhine<sup>10</sup>.

Bunga sang gerang agresyon sini batuk sa Afghanistan, nakaangkon ang US sang tungtungan para dugang masulod ang Central Asia kag ang Caspian Sea Region kag para makalatagsang alagyan sang langis nga maagi sa Afghanistan kag Pakistan padulong sa baybayon sang Arabian Sea kag sa Indian Ocean, nga malaktaw na sa Persian Gulf kag nagadis-ayre sa iban nga mamuhunan sa iban nga mga alagyan sang langis pakadto sa Russia kag China.

Sa subong nga gerang agresyon batuk sa Iraq, tuyo sang US nga direktang kontrolon ang ikaduha sa pinakadaku nga prodyuser sang langis sa Organization of Petroleum Exporting Countries (OPEC) kag sa sini dugang makontrol ang OPEC, ang Middle East kag ang katambi nga mga rehiyon sang Central Asia kag Caspian Sea. Gusto man sini baliskaron ang huyog sa kubay sang mga pungsod nga katapu sang OPEC nga gamiton ang Euro baylo sa dolyar sang US bilang kwarta sa mga transaksyon sa langis kag silutan ang Iraq bangud sa nagpanguna sa sining huyog sadtong hingapusan sang 2000<sup>11</sup>.

Nagabangon ang mga mamumugon kag mga pigos nga pumuluyo sa kalibutan sa mga dalagku nga aksyong masa agud iprotesta ang imperyalista nga gerang agresyon sang US batuk sa Iraq. Patimaan ini sang nagataas nga kamuklatan sa pagpamalabag kag pagbatu sang pumuluyo sa imperyalismo. Madugay na nga nagabukal sa kaakig ang pumuluyo sa mga pang-ekonomya kag

pangkatilingban nga kahalitan nga ginsabwag sang monopolyong kapitalismo batuk sa ila.

Nagasingki ang mga mayor nga kontradiksyon sa kalibutan sa tunga sang mga imperyalista kag sang mga pigos nga pumuluyo, sa tunga sang mga imperyalista kag mga gubyrno nga nagapanindugan sang pungsodnon nga kahilwayan, sa tunga sang mga imperyalistang gahum kag sa tunga sang monopolyong burgesya kag proletaryado sa mga imperyalistang pungsod. Ang pang-ekonomya kag pangpinansya nga krisis naglab-ot sa sosyal kag pulitikal nga krisis kag kinagamu sa pangkalibutanon nga sakup.

May *hyperpower*<sup>12</sup> nga arogansya nga ginabalabad sang US kag ginalapakan sini ang pungsodnon nga soberanya sang mga pumuluyo sang kalibutan kag ginapamuyungan ang ila manggad pangkatilingban. Ginapabugal sang subong nga mga pinuno pangpulitika sang monopolyong



---

**Sa subong kag ginasigahum  
nga kahimtangan,  
magapasingki sang  
pumuluyong Pilipino kag  
sang ila mga  
rebolusyonaryong pwersa  
ang armadong panghimakas  
kag hingabuton ang  
kadalag-an sang bag-ong  
demokratikong rebolusyon.**

---

burgesyang sang US napundar sang US ang pinakadaku nga emperyo sa kasaysayan sang sangkatawhan, sa paagi sa paggamit sang iya di malabawan nga *high-tech* nga kusog militar kag paghingalit sa pang-ekonomya kag pangkatilingban nga pagkaatrasado sang ikatlong kalibutan kag sa mga pungsod sang anay blokeng Soviet, nga subong lunsay nalubong sa US\$ 3 trilyones nga utang pangluwas.

Tanan na lamang ginabangdan sang mga imperyalistang US agud lampusan ang mga gubyrno nga nagapanindugan sa ila kahilwayan. Nagadaku ang banggianay nila kag sang ila mga imperyalistang alyado kag ila pila ka anay papet nga gubyrno. Kag sa sulod mismo sang mga imperyalistang pungsod, labi mga nagabatu ang proletaryado kag pumuluyo sangsa nagtaliwan.

Ang pumuluyong Pilipino kag mga rebolusyonaryong pwersa wala natiplang sa mga promisa sang US kag sang mga Pilipino nga idu-idu sini nga malapit na nga makabawi ang ekonomya sang US kag sang pangkalibutanon nga sistemang kapitalista kag sa pamaagi kuno sini makatibawas ang Pilipinas halin sa depresyon sang ekonomya, malaparan nga disempleyo kag lapnagon nga kaimulon. Wala untat nga ginapalala sang US kag iya idu-idu sini ang pagpamigos kag pagpanghimulos sa pumuluyong Pilipino.

Wala man makugmat ang pumuluyong Pilipino kag mga rebolusyonaryong pwersa sa gahum teknolohikal kag militar sang imperyalismong US. Nasaksihan nila kon paano ini napaslawan sa nasambit nga kagamhanan sa nauna nga mga

inaway banwa sa Asia, pareho sang sa China, Vietnam kag Korea. Sila mismo nagmadinalag-on sa pagpaslaw sa kada padihot sang US agud waskon ang rebolusyonaryo nga kahublagang masa. Nagmadinalag-on sila batuk sa diktaduryang Marcos nga ginsuportahan sang US kag ang nagbulos nga mga reaksyunaryong rehimen.

Ginpakita na sang US ang pagka-inutil niya sa kapaslawan sang mga pagtinguha sini nga waskon ang isa ka gamay nga bandidong hubon, ang Abu Sayyaf, nga gintukod niya sadtong dekada 1990 agud uk-ukon ang Moro National Liberation Front. Sa ano pa man, ang teroristang hubon nga gintukod sang CIA ang ginbangdan sang US para sa interbensyon militar batuk sa mga rebolusyonaryong pwersa sang pumuluyong Pilipino kag sang Bangsamoro, partikular ang mga armadong kusog sang Partido Komunista sang Pilipinas kag sang Moro Islamic Liberation Front (MILF).

Samtang labi ini nga mapanakup kag mapangsalakay bunga sang krisis, labing atubangon sang mga imperyalistang US ang pagpamatuk sang mga mamumugon kag mga pigos nga pumuluyo, mga hilway nga gubyerno kag ila mismo mga imperyalistang karibal.

Ang mga armadong kahublagan sa Pilipinas, Nepal, India, Turkey, Palestine, Columbia, Venezuela, Iran, Peru kag iban pa nga pungsod mahimo dugang nga magbaskog kag magahatag inspirasyon sa mas madamu nga pumuluyo nga pagsunod sa dalan sang armadong rebolusyon. Ang mga gubyerno sang China, North Korea, Cuba, Vietnam, Syria, Iraq, Libya kag iban pa nga pungsod nagapanindugan sa nagkalain-lain

---

**Ang nagahari nga koalisyon ni Arroyo nagapihak-pihak kag nagakawasak bunga sang kumpetensya sa kurapsyon, gani mismo si Arroyo labi nga nasamad kag naghamulag bangud sa wala ikasarang siya magpaguwa sang ano man mapatihan nga polisiya agud mapahagan-hagan ang makaluluoy kahimtangan pangkatilingban.**




---

nga lebel sang pungsodnon nga kahlwayan agud batuan ang mga pagpanalakay sang US.

Sa subong kag ginasingahum nga kahimtangan, magapasingki ang pumuluoyong Pilipino kag ang ila mga rebolusyonaryong pwersa ang armadong paghimakas kag hingabuton ang kadalag-an sang bag-ong demokratikong rebolusyon. Handa sila nga atubangon kag awayon ang kada pagpataas sang armadong interbensyon sang US kag pati ang lubos nga gerang agresyon sang US.

Ginaabi-abi nila ang hangkat kag kahigayunan nga makabalos sa mga imperyalista angot sa 1.5 milyones nga Pilipino nga ginpamatay sang pwersang mapanakup sang US halin sa pag-umpisa sang Gera Pilipino-Amerikano sadtong 1899 asta matapos ang kampanya nga

pasipikasyon sang US sadtong 1913 kag tapuson ang pagpanghimulos kag pagpamigos nga gin-antos sang mga henerasyong Pilipino sa idalum sang imperyalismong US sa masobra isa ka gatos ka tuig.

### **3. NAGAGRABE NGA KRISIS SANG LOKAL NGA NAGAHARING SISTEMA**

Ang labing nagagrabang krisis sang US kag pangkalibutanon nga sistemang kapitalista nagahalit sa malakolonyal kag malapyudal nga nagaharing sistema sa Pilipinas. Madasig nga nagalala ang tanannga-bahin nga permanenteng krisis sang sistema. Indi makalikaw sa krisis ang mga mapanghimulos nga sahi sang mga dalagku nga kumprador kag agalon nga mayduta.

Sa idalum sang islogan nga globalisasyon sang "hilway nga merkado", maathag nga ginadumili sang imperyalismong US sa papet nga estado sang Pilipinas nga maggamit sang mga pundo pangpubliko agud maghimo ukon magpasikad sang pungsodnon nga kauswagan industriyal. Ginadikta sini sa estado ang liberalisasyon sang mga dumuluong nga kapital kag mga produkto, pribatisasyon sang mga propyedad sang estado kag pagkuha sa mga regulasyon nga nagahatag gamay nga proteksyon sa mga anakbalhas kag sa kapalibutan.

Ang Pilipinas wala sang ano man nga tipo sang produkto nga mabaligya sa pangkalibutanon nga merkado luwas sa hilaw nga materyales kag semimanupaktura nga may manubo nga gindugangnga-balor. Sobra ang suplay sang tanan nga ini. Maka-eksport man gihapon sang amo nga produkto pero sa manubo katama nga



presyo. Kadungan sini, ginbukas na sang estado ang merkado sang Pilipinas sa pagbaha sang tanan nga tipo sang produkto, lakip na ang pangunahon nga pagkaon agrikultural, sa ikasamad sang mga lokal nga prodyuser.

Sa pihak sang iya kumprehensibo nga base sang pungsodnon nga resorsa kag daku nga populasyon sini, banggian ang ekonomya sang Pilipinas bunga sang imperyalista kag pyudal nga pagpaghimulos. Halos tanan ginaangkat sini: mga manupaktura pangkonsumo, mga makinarya kag hilaw nga materyales para sa limitado nga pagproseso, daku nga kantidad sang panggatong kag mga luho para sa mga mataas sang sahi.

Ang kinaandan nga tuigan nga resulta may daku nga dugang sa depisit sa negosyo kag sa utang sa luwas nga lampas na sa \$54 bilyones. Kon may ara man nga sarplas sa negosyo sa ano man nga di kinaandan nga tuig, resulta ini sang pagbuhin sa import kag lokal nga produksyon. Sa subong, ang rehimeng Arroyo daku nga nagasalig kag nahigot sa US bangud sa nagautang ini sa mga bangko sang US sang kinaandan nga US\$51.7 milyones kada bulan kag sa mabug-at nga mga kundisyon.

Ang pagkabangkrap sang ekonomya sang Pilipinas nabuyagyag indi lamang sa nagahabok nga depisit sa negosyo sa luwas kag utang sa luwas kundi pati sa nagapadaku man nga depisit sa badyet kag lokal nga utang pangpubliko sang reaksyunaryo nga gubyrno. Kulang katama ang buhis kag iban nga koleksyon sang gubyrno sa nagadaku nga gastos labing kontraproduktibo nga mga katuyuan.

Ang pagkupos sa kita sang estado amo ang resulta sang depresyon pang-ekonomya, liberalisasyon sang balaligyaan, nauna nga pribatisasyon sang mga korporasyon sang gubyrno kag burukratiko nga kurapsyon. Nagapataas ang gastos sang gubyrno para sa pagbayad sa utang, militar kag pulis, sa mga proyektong imprastruktura nga puno sang kurapsyon kag sang maluho nga mga pasilidad sang pinakamataas nga upisyal sang gubyrno. Nagabuhin ang gastos pangkatilingban para sa pangpubliko nga edukasyon, ikaayong lawas kag pabalay.

Akig ang malapad nga masa sang pumuluyo sa ginpahabok nga datos sang balor sang produksyon sa sektor sang serbisyo kag sa palso nga pagsugid sang rehimen nga mataas nga tantos sang pagdaku sa *gross national product*. Sa kamatuoran, nagguba ang produksyon bangud sa mataas nga bili sang mga imported nga sangkap kag pagnubo sa demanda bangud sa paggamay sang ginakita.



**Ang ribalan sa tunga sang mga paksyon sang mga upisyal sang militar kag pulis nagasalaming sa ribalan sang mga reaksyunaryong pulitiko kag isa ka mayor nga paktor sang nagagrabe nga krisis pangpulitika.**

Lapnagon ang mga pagkabangkrap kag madamuan nga pagbuhin sang mga empleyado. Ginaako bisan sang rehimen ang sobra 10 porsyento ang tantos sang wala trabaho. Ang minimum nga nagaabot sa indi magnubo sa 50 porsyento ang matuod nga kabilugan nga wala empleyo kon sundon ang husto nga depinisyon sang empleyo. Ang kita sang kadam-an sa mayorya nga mga mamumugon kag mangunguma kulang agud makatabang gutom kag labi nga nagalubong sa ila kautangan. Yara sa idalum sang lebel sang kaimulon ang 86 porsyento sang pumuluyo. Mayorya sang kababaihan kag mga bata nagabatyag sang malnutrisyon.

Nagaantos ang masa sang anakbalhas-mga mamumugon kag mangunguma kag ang nahanunga nga saray sa madasig nga pagtimbuok sang mga presyo sang mga basehang kinahanglanon, pagdaku sang mga buhis kag nagtaas sa mga balayran para sa mga basehang serbisyo sosyal pareho sang tubig, elektrisidad, pangpubliko nga transportasyon kag iban pa. Biktima na sila sang nagataas nga gastos sa edukasyon ang pamatan-on, ginapabudlayan pa sila makakita sang trabaho. Manubo katama ang kahigayunan sang mga kababaihan nga makakita sang trabaho sa sulod sang pungsod sangsa mga lalaki. Gani, sila ang nagabug-os sang kadam-an nga Pilipino nga nangin *overseas contract workers* (OCW).

Ang kakulang sang kauswagan pang-ekonomya kag mataas nga tantos sang disempleyo ang nagatulod sa 10 porsyento sang populasyon nga mangin OCW nga wala sang mga kinamatarung mag-unyon kag pilit nagabaton sang sweldo nga mas manubo ikumparar sa mga sweldo sang mga pumuluyo sa pungsod nga

ginaobrahan. Ang kababaihan amo ang labing bulnerable sa madamo nga sari sang mga pagpang-abuso, ilabi kon sila ginarekrut bilang mga tagalingaw kag suluguon sa balay.

Wala sang ginahimo ang rehimen agud mapahagan-hagan ang pang-ekonomya kag pangkatilingban nga pag-antos sang pumuluyo, ginbansagan pa sini nga "terorista" ang mga mamumugon bangud sa paggamit sang ila mga kinamatarung sa pag-union kag pagdemanda sang maayo nga sweldo kag pagpangabuhi. Sa bibig pirme ang reporma sa duta pero ginaduso niya ang reklasipikasyon sang mga duta agrikultural agud ipagguwa sa reporma sa duta. Gina-engganyo sini ang labi nga konsentrasyon sang mga duta sa mga kamot sang pila ka korporasyon kag mga pamilya sang mga agalon nga mayduta.

Samtang nagaggrave ang pang-ekonomya kag pangkatilingban nga krisis, nagalala ang krisis pangpulitika sang nagaharing sistema. Sa pagkupos sang mabenepisyos sa poder, labi ng nagapintas sangsa nagtaliwan ang pag-agaway sa magkaribal nga paksyon pangpulitika sang mga mapangharing sahi. Nangin kinaandan na ang gawi nila nga ibuyagyag ang baho sang kada isa sa pag-angop sang suporta publiko sa tunga sang diskontento kag sosyal nga kinagamu.

May mainit nga kumpetisyon sa pulitika indi lamang sa tunga sang mga partido pangpulitika ukon koalisyon kundi sa sulod mismo sang nagahari kag oposisyon nga partido kag koalisyon. Sa masami, ang kumpetisyon nagaporma sang away sang mga personahe kag

---

**Bangud sa mga kundisyon sang krisis, ginaduso ang mga imperyalista kag mga lokal nga reaksyunaryo nga magsabwag sang kalakasan. Ugaling ang mga kundisyon man nga ini ang paborable para pasingkion sang mga rebolusyonaryong pwersa ang armadong rebolusyon.**



---

pamilya sa kubay sang mga mapanghimulos nga sahi.

Ang nagahari nga koalisyon ni Arroyo nagapihak-pihak kag nagakawasak bunga sang kumpetensya sa kurapsyon, gani mismo si Arroyo labi nga nasamad kag naghamulag bangud sa wala ikasarang siya magpagguwa sang ano man mapatihan nga polisiya agud mapahagan-hagan makaluluoy nga kahimtangan pangkatilingban. Gani sadtong hingapusan sang tuig iya gin-anunsyo nga indi na siya magpadalagan sa pagkapresidente sa 2004.

Matuoron man niya ukon indi, ang punto nga napilitan siya maghimo sa di-kinaandan nga pahayag nga nagapakita sang iya mahina nga pusisyon sa pulitika. Sa pagkamatuod, madinalag-on nga nahamulag na siya sang malapad nga nagahiliugyong prente nga ginatib-ong sang mga legal nga demokratikong pwersa kag oposisyunistang sa sulod kag guwa sang nagaharing koalisyon bangud sa pag-ikog-ikog,

kurapsyon, wala ikasarang kag pagkamapiguson sang iya rehimen.

Ang ribalan sa tunga sang mga paksyon sang mga upisyal sang militar kag pulis nagasalamang sa ribalan sang mga reaksyunaryong pulitiko kag isa ka mayor nga paktor sang nagaggrave nga krisis pangpulitika. Utang sang mga upisyal sang militar kag pulis ang ila promosyon sa ila mga padrino pangpulitika kag sa sini madali maimbolbar sa mga away pangpulitika kag sa mga pamahog sang kudeta kag kontra-kudeta sa pinakamataas nga lebel.

Ang pinakamalaut nga mga upisyal militar kag pulis nagakumpetisyon agud pagaharian ang mga sindikato kriminal nga yara sa ilegal nga pasugal, prostitusyon, droga, *kidnap-for-ransom*, ismagling kag iban pa. Ang labing ambisyoso sa mga ini nagapresentar sa ila kaugalingon bilang mga kandidato para presidente, bilang senador ukon kongresista ukon upisyal sang lokal nga guberno. Nagakuha sila sang kapital para sa pangpulitika kag kampanya elektoral halin sa mga operasyon kriminal.

Ang interbensyon sang US sa ekonomya, pulitika kag militar labi nga nangin hayag bangud sa polisiya ni Bush nga "gera kontra sa terorismo". Ginahingalitan sini kag ginagamit nga bangdanan ang mga atake sang Septyembre 11 agud labing hugton ang kontrol sang US sa mga halambalanon pangpulitika kag pang-ekonomya kag ibalik liwat ang mga tropa pangkombat kag base militar sang US sa teritoryo sang Pilipinas.

Si Arroyo isa ka makahuluya nga papet sang imperyalistang US. Bantog siya sa pagduso sang globalisasyon sang "hilway nga merkado" kag pagtanum sang mga ahente nga makaa-US (kabahin sang malikumon nga grupo nga

ginatawag AGILE) sa burukrasya agud maghimo sang mga polisiya kag layi nga pabor sa US kag sa mga multinasyunal nga korporasyon sang US.

Ginagamit sang US bilang iya *handler* si sekretaryo sa depensa Angelo Reyes. Gintulod siya ni Reyes nga paralisahon kag palugdangon ang mga negosasyon pangkalinungan sang GRP-NDFP kag ideklarar ang polisiya sang todo nga gera batuk sa mga rebolusyonaryong pwersa. Siya man nagduso kay Arroyo nga magbalay sang layi kontra-terorismo nga ginkopya sa USA Patriot Act, pagbaton sang Mutual Logistic Support Agreement (MLSA) kag pahanugutan ang mga tropa sang Amerikano nga magpasakup sa mga operasyon kombatan sa Pilipinas.

Ginapatuman na ang mga plano sa pag-amendar sang 1987 nga konstitusyon sang reaksyunaryong gubyerno agud kuhaon ang mga pungsodnon nga sablag sa dumuluong nga pamuhunan kag sa pagdumili sa mga tropang kombatan kag mga base sang US sa Pilipinas.

Nagahandum nga mangin primer ministro si Speaker Jose de Venecia isa idalum sang sistemang parlamentaryo nga pagaaprubahan sang isa ka *consituent assembly* sang duha ka panaligan sang Kongreso<sup>13</sup>. Ugaling ginahamso na sang US si Reyes nga magabulos kay Arroyo. Mas pabor man ini sa pagtawag sang isa ka kumbensyon konstitusyunal.

Ang mga ahente sang CIA kag si Reyes amo ang responsible kon ngaa nagabaskog ang buot sang Abu Sayyaf nga maghimo sang *kidnap-for-ransom* kag mga terorista nga pagpangbomba agud hatagan rason ang partisipasyon sang mga tropang Amerikano sa

mga operasyon pangkombatan batuk sa mga rebolusyonaryong pwersa sang PKP kag MILF.

Ginpabaskog ni Reyes ang mga kampanya militar sang pagtapna batuk sa mga rebolusyonaryong pwersa umpisa 2001, gani napadayon sa idalum sang rehimeng Arroyo ang polisiya sang todo-gera nga ginduso niya sa idalum sang rehimeng Estrada. Siya man ang responsible sa paglapas sa kasugtanan sang untat-lupok sang GRP-MILF. Ginabuyok siya sang mga ahente sang US CIA nga mga eksperto sa saywar agud tugahon ang kinagamu kag magpadalagan bilang presidente nga nagalaragway sa kaugalingon bilang isa ka mabakod nga nagbalik sang kalinungan.

Lubos nga nagapasugot si Arroyo sa US kag kay sekretaryo sang depensa Angelo Reyes sa pagpamilit sang pagsurender sang NDFF. Ang katuyuan nila tanan amo nga palugdangon sugilanon



---

**Sa kada estratehikong erya  
sa kada rehiyon sang kada  
mayor nga isla, kinahanglan  
naton pasanyugon ang  
pagpauswag sang pila  
ka erya nga may ara kita  
malig-on nga kontrol.  
Kinahanglan tumuron naton  
ang mga estratehikong erya  
kag ipaabot sa mga mataas  
na organo.**

---

pangkalinungan sang GRP-NDFF sa basehan sang kuno nagbalibad ang NDFF nga magsurender paagi sa pagpasugot sa isa ka "final peace agreement" nga ginbalay pabor sa GRP.

Agud palubugon ang sugilanon pangkalinungan sang GRP kag NDFF, nakighimbon ang GRP sa gubyernong US agud ilita ang Partido, BHB kag ang *chief political consultant* sang NDFF nga mga "terorista" kag magkampanya sa iban pa nga gubyerno (Britain, Canada kag Australia) kag sa Council of the European Union nga magsunod sa US. Tuyo sang GRP nga pahugon ang *negotiating panel* sang NDFF kag himuon nga mabudlay tigayunon ang sugilanon pangkalinungan sang GRP-NDFF.

Ginasunod ni Arroyo ang dikta sang imperyalismong US nga dugang pasingkion ang armadong kontrarebolusyon sa ngalan sang kontra-terorismo. Nagabulag-bulagan siya sa kamatuoran ang mga prayoridad nga mga kampanya militar sang pagtapna batuk sa 12 prenteng gerilya sang BHB sugod 2001 napaslawan magpugong sa pag-abanse sang rebolusyonaryong hublag. Walay pulos nga padayon siya sa paghandum nga pwede pa siya makadalagan para presidente kon magguba niya ang Bag-ong Hangaway sang Banwa.

Daw ginakalipatan sang US kag mga papet sini sa Pilipinas nga ang armado nga rebolusyonaryong hublag nagbaskog bisan pa 14 anyos nga naghari ang pasistang diktaduryang Marcos kag nagbenepisyo sa presensya sang mga base militar sang US kabaylo sang dalagku nga mga suplay militar kag bulig pinansyal para sa rehimen.

Sa kahimtangan sang dugang nga pagtapna kag pagpamahug sang isa ka bag-ong rehimen sang

hayag nga terorismo, ang US kag iya mga papet kon usisaon amo mismo nagaduso sa pumuluyong Pilipino kag sa mga rebolusyonaryong pwersa nga pasingkion ang armadong rebolusyon.

Bangud sa mga kundisyon sang krisis, ginaduso ang mga imperyalista kag mga lokal nga reaksyunaryo nga magsabwag sang kalakasan. Ugaling ang mga kundisyon man nga ini ang paborable para pasingkion sang mga rebolusyonaryong pwersa ang armadong rebolusyon.

#### **4. PATAASON ANG LEBEL SANG INAWAY BANWA**

Bangud mismo sa grabe nga krisis sang pangkalibutanon nga sistemang kapitalista kag sang lokal nga nagaharing sistema, desperado nga nagakapyot subong ang papet sang US nga rehimeng Arroyo nga sakdagon ang polisiya sang todo-gera kag imbitaron ang armadong interbensyon sang US sa ngalan sang "gera kontra terorismo" sa pagtuyo nga pahugon ang malapad nga masa sang pumuluyo.

Pero sa nagligad Plenum sini, nagbalay ang Komite Sentral sang Partido Komunista sang Pilipinas sang isa ka 3-Tuig nga Plano para sa 2003-2005 agud pataason ang lebel sang inaway banwa kag agumon ang tanan-nga-bahin nga mga pagsulong sa rebolusyon. Ginhimo ini pagkatapos magsuma kag kuhaan sang mga leksyon ang nagtaliwan nga 3-Tuig nga Plano para sa 1999-2002, sa ubay sang Marxismo-Leninismo-Maoismo kag sa partikular, sang Ikaduha nga Dungganon nga Kahublagan Pagpanadlong.

Ang kabilugan nga katuyuan amo ang lubos nga batuan kag lutuson ang nagasingki nga mga atake sang rehimeng US-Arroyo

---

**Atubangon naton ang problema sang mga hangaway nga nagapauli. Kinahanglan magsunod kita sa rekisitos sa pagrekruta, maghimo sang hilikiton pangpulitika sa kubay sang mga hangaway, buligan sila nga pangibabawan ang mga kabudlayan kag problema kag pamatukan ang ano man nga pagkamatinaastaon nga aktitud sa bag-ong rekrut.**

---



kag isulong ang demokratikong rebolusyon sang banwa sa isa ka bag-o kag mas mataas nga lebel.

#### **Ang mga pangunahon nga katuyuan amo ang:**

1) Dugang nga magpalapad kag pasingkion ang anti-imperyalista, antipyudal kag antipasista nga paghimakas. Ihamulag kag pukanon ang rehimeng US-Arroyo. Batuan ang nagapataas nga armadong interbensyon sang US kag terorismo sang estado.

2) Palab-uton ang mga prenteng gerilya sa mayorya sang mga munisipalidad, ilabi na ang sa mga estratehikong bahin sang kapuluan. Tukuron ang mga rekisitos agud malab-ot ang nahanunga nga halintang sang estratehikong dependensiba paagi sa

labing pagpalapad kag paghatag dugang nga igtalupangud sa pabalud-balod nga konsolidasyon sang kada munisipalidad. Pasingkion ang pagpakig-away gerilya, palaparon kag padasigon ang rebolusyong agraryo kag palig-unon ang pang-organisasyon, pangpulitika, pang-ekonomya, pangdependensa kag pangkultura nga mga ikasarang sang baseng masa.

3) Sakdagon ang pagpamuno sang Partido sa BHB kag sa armadong rebolusyon. Buyukon ang pumuluyo sa ila minilyon sa armadong rebolusyon paagi sa polisiya kag mga taktika sang nagahiliugyong prente. Palaparon kag pabaskugon ang angot kag kooperasyon sa tanan nga posibleng alyado.

4) Pabakuron ang Partido sa ideolohiya, pulitika kag organisasyon. Palapnagon ang Marxismo-Leninismo-Maoismo. Isulong ang bag-o nga demokratikong rebolusyon sang banwa. Ipatuman ang isa ka kampanya sang rekrutment sang Partido sa katuyuan nga abuton ang ginatos ka linibo nga mga katapu sang Partido.

#### **Tukuron ang mga prenteng gerilya**

Dapat tukuron naton ang mga prenteng gerilya sa mayorya sang mga munisipalidad kag pataason sang 20 porsyento ang subong nga numero. Kinahanglan maabot naton ang kusog kumpanya sang BHB sa kada prenteng gerilya. Dapat konsolidahon naton ang platoon bilang sentro-de-grabidad sa kada munisipalidad sa prenteng gerilya.

Ang mga nagakaulihi nga rehiyon sa halambalanon sang armadong kusog kinahanglan



buligan sa tatlo ka pamaagi agud makalagas: dugang nga atensyon kag ubay halin sa sentro, dugang nga suporta halin sa kasyudaran angot sa mga kadre, propaganda kag pagpapagsik sang kahublagang masa kag muklat nga suporta halin sa mga mabaskog nga rehiyon.

Sa kadam-an nga mga rehiyon, kinahanglan may aton indi magnubo sa anum ka prenteng gerilya, nga kada isa may kusog kumpanya. Sa kada prenteng gerilya nga may kusog kumpanya, kinahanglan debeloparon naton ang tatlo ukon masobra nga puong-puong sang pito ka konsolidadong baryo sa paborable nga tereyn.

Kinahanglan ibase naton ang ekspansyon sa konsolidasyon. Kinahanglan mangin maayo kita sa pagkonsolida kag pagpauswag sang mga prenteng gerilya agud magpatuhaw ang ikasarang pangpulitika kag pangmilitar agud magtukod sang dugang nga mga prenteng gerilya. Kadungan sini, kinahanglan maksimisahon naton ang suporta halin sa kasyudaran kag iban pa nga sentrong urban sa halambalanon sang mga kadre halin sa kubay sang mga mamumugon kag nakatuon nga pamatan-on, propesyunal kag teknikal nga kahanasan kag materyal nga bulig.

Kinahanglan hatagan igtalupangud naton ang pagtabu-tabo sang mga prenteng gerilya kag pauswagon ang magkatambi nga angtanay agud maksimisahon ang kooperasyon. Kinahanglan handaan naton ang pagpauswag sang istable nga mga baseng erya bunga sang pagtabo sang pila ka prenteng gerilya. Sa kada estratehikong erya sa kada rehiyon sang kada mayor nga isla, kinahanglan naton pasanyugon ang pagpauswag sang pila ka erya

nga ara kita malig-on nga kontrol. Kinahanglan tumuron naton ang mga estratehikong erya kag ipaabot sa mga mataas nga organo.

Ang isa ka prenteng gerilya mahimo mabahin-bahin sa baseng gerilya kag mga sonang gerilya. Ang platun bilang sentro-de-grabidad nagabase mismo sa baseng gerilya. Ini ang pinakakonsolidado nga lugar sang prenteng gerilya bangud sa mas maikit nga hilikuton pangmasa sa sakup sini. Ang platun ukon mga platun, mabahin-bahin sa mga iskwad kag mga hubon sang armadong propaganda, depende sa sitwasyon ukon katuyuan, nakabase sa mga sonang gerilya sa sulod sang mas malapad nga lugar sa guwa sang baseng gerilya. Ang mga sonang gerilya amo ang sang prenteng gerilya nga mas manubo pa ang konsolidasyon.

Mahimo suguran sang platun ang pagtukod sang isa ka prenteng gerilya. Nagahimo ini sang hilikuton pangmasa, nagabalay kag nagahanas sang mga milisya sang pumuluyo kag naglunsar sang mga taktikal nga opensiba agud



---

**Trenta'y kwatro anyos sang  
armadong paghimakas ang  
nagtudlo sa aton sang  
madamo nga taktika agud  
lutuson ang kaaway kag  
disarmahan ang mga bahin  
sang armadong kusog sang  
kaaway.**

---

makakuha sang dugang nga armas agud abuton ang kusog kumpanya.

Kinahanglan naton sundan kag maidid tun-an ang Kampanya Bantay Laya sang kaaway agud mangin epektibo nga mapaslaw ini. Kinahanglan detalyado nga tun-an ang inagihan sang puong-puong nga mga baryo nga madugay ginkaptan sang mga *special operations team* sang kaaway, tumuron ang mga problema kag huluhalingtang nga lubaron ini.

### **Padakuon kag pabakuron ang hangaway sang banwa**

Kinahanglan pauswagon naton ang platun bilang basehang pormasyon. Kinahanglan mangin maayo kita sa pagpamuno kag pagdumala sang platun bilang sentro-de-grabidad sa mga prenteng gerilya kag mga rehiyon. Upod sa komiteng rehiyunal sang Partido, ang rehiyunal nga kumand sa operasyon kinahanglan may isa ka platun, pinadaku nga platun ukon kumpanya bilang sentro-de-grabidad sa rehiyunal nga lebel.

Kaayuhon naton ang aton rekrutment kag paghanas sang mga hangaway. Kinahanglan sundon naton ang mga rekisitos sa edad, pulitika, organisasyon kag mental kag pisikal nga ikasarang. Kinahanglan magrekrut kita sang mas madamo nga mamumugon kag nakatuon nga pamatan-on kag ikumbinar sila sa mga hangaway halin sa sahing mangunguma. Hanason naton ang indi magnubo sa 25 porsyento sang aton Pulang hangaway agud mangin upisyal sa nanuhay-tuhay nga lebel. Kinahanglan pauswagon naton ang pormal nga kurso para sa paghanas sang upisyal.

Sistematisahon naton ang paghanas pulitiko-militar sa mas malapad nga sakup. Hatagan

naton tiempo ang paghimo sang mga regular nga dril samtang nagatungod sang aton mga hilikuton. Pabakuron naton ang pamunuan sang Partido kag maghimo sang buhi nga pangpulitika nga hilikuton sa hangaway. Palapnagon naton ang pangkabilugan nga pangpulitikang edukasyon kag sang basehang kurso sang Partido, ang demokrasya sa tatlo ka patag kag itib-ong ang disiplina kag pagtimbangangay.

Atubangon naton ang problema sang mga hangaway nga nagapauli. Kinahanglan magsunod kita sa rekisitos sa pagrekruta, maghimo sang hilikuton pangpulitika sa kubay sang mga hangaway, buligan sila nga pangibabawan ang mga kabudlayan kag problema kag pamatukan ang ano man nga pagkamatinaas-taason nga aktitud sa mga bag-ong rekrut.

Kinahanglan maghatagan atensyon ang Komite Sentral sang Partido kag Rehiyunal nga Komite sang Partido ang mga halambalanon militar. Sa pulupananon, kinahanglan naton magtasa kag mag-analisa sang hilikuton kag mga halambalanon militar agud maubayan ang Partido kag hangaway sa ila mga kongkretong hilikuton, madasig magsabat sa mga pagbag-o-bag-o sang sitwasyon kag sa mga tikang kag taktika sang kaaway kag gilayon malubad ang mga problema.

Kinahanglan naton magtuon sang teorya pangmilitar, magpanalawsaw kag lubaron ang mga problema sa estratehiya kag taktika. Kinahanglan pabaskugon ang sistema sang kumand. Kinahanglan papagsikon liwat naton ang mga pungsodnon kag rehiyunal nga kumand sa operasyon. Kinahanglan hatagan prayoridad ang pagplano,

---

**Kinahanglan naton  
pangapinan ang pumuluyo  
sa tion nga ginalapakan  
sang mga tropa sang US ang  
pungsodnon nga soberenya  
kag ang teritoryo sang  
demokratikong gubyrno  
sang pumuluyo.  
Kinahanglan maging handa  
kita nga batuan ang  
pagsilabot kag agresyon  
militar sang US.**



---

paghanas, espesyal nga operasyon, paniktik, ordnans, lohistika kag mga kinahanglanon medikal.

Tukuron naton ang sanga sang Partido sa lebel sang platon kag grupo sang Partido sa sulod sang iskwad. Kinahanglan superbisahan sang Buro sa Instruksyon ang pangkabilugan nga edukasyon pangpulitika kag edukasyon sang Partido samtang kinahanglan himuon sang Pulitiko-Militar nga Eskwelahan ang paghanas pulitiko-militar. Mas masunson maghiwat kita sang mga kumperensya pulitiko-militar para sa mas malapad pagbayluhanay sang panan-awan kag eksperensya.

Dapat naton pabakuron ang sistema sang pagreport, pagsuma kag pagtasa sang mga taktikal nga opensiba. Malahalon sa propaganda nga gilayon naton ginabalita sa pumuluyo ang aton mga kadalag-an sa mga

patag-awayan.

Ang mga pungsodnon kag rehiyunal nga lebel sang kumand kinahanglan maghatag atensyon sa mga yabi nga away, espesyal nga operasyon, koordinado nga operasyon sigun sa mga direktiba sang mga mataas nga organo pareho sang KS, KP, Komisyon Militar, KT kag mga Komiteng Rehiyunal sang Partido.

Kinahanglan mapabaskog naton ang armadong kusog sang hangaway sang pumuluyo pangunahon paagi sa mga taktikal nga opensiba. Bilang pangsuporta, pwede kita makaobra sang pila ka armas kag makabakal man paagi sa mga abyan kag mga manugbaligya.

Kinahanglan seryoso nga tukuron naton ang mga milisya sang pumuluyo bilang aton lokal nga pulis kag bilang suporta kag reserbang pwersa sang mga pultaym nga yunit sang hangaway sang banwa. Pwede kita makahanas sang indi magnubo isa ka platon kada baryo sa mga prenteng gerilya sa hilikuton pangpulis kag internal nga seguridad.

Kinahanglan man buyukon naton ang mga organisasyong masa nga magtukod sang mga yunit sang depensa sa kaugalingon kag hatagan sila sang paghanas kag mga pagtuon sa mga pamaagi sang pagsarbeylans sa kaaway kag sa hilikuton transportasyon kag komunikasyon sa atubang sang mga kampanya sang pagtapna sang kaaway.

Kinahanglan naton maglatag sang malapad nga aktibong lambat paniktik paagi sa pagpahulag sa masa. Kinahanglan mangin maayo kita sa paghimo sang paniktik kag pagtukib sa mga lambat paniktik sang kaaway agud bungkagon ini. Kinahanglan naton sistematisahan ang pagreport, pag-analisa, pag-

ebalwar kag konsolidasyon sang natipon nga impormasyon.

Kinahanglan maayo ang hangaway sang banwa sa paghimo sang hilikuton pangseguridad, pagtago sang sekreto kag pagpaslaw sa mga padihot kag atake sang kaaway. Kinahanglan permi kita mangin muklat kag magsunod sa pagsulundan angot sa mga ini. Kinahanglan likawan nga mabutang sa dependensiba kon maglunsar ang kaaway sang iya taktikal nga opensiba kontra sa aton.

Kinahanglan naton magtukod sang mga armadong partisano sa syudad halin sa kubay sang mga Pulang hangaway nga nakaalagad sa BHB sang indi magnubo sa duha ka tuig kag may ihibalo bahin sa syudad nga ginatalana sa ila. Kon wala nagahanda sa paglunsar sang taktikal nga opensiba sa syudad, ang armadong mga partisano sa syudad kinahanglan nakabase sa kaumhan.

### **Pasingkion ang mga taktikal na opensiba**

Agud masiguro nga ang armadong rebolusyon may malapad kag madalum nga nakaugat sa pumuluyo, kinahanglan maghinguyang ang hangaway sang banwa sang 90 porsyento sang iya tiempo sa hilikuton pangpulitika kag 10 porsyento sa mga taktikal nga opensiba.

Ang mayor nga platon, bilang sentro-de-grabidad sa prenteng gerilya, kinahanglan magtinguha nga makalunsar sang isa ka taktikal nga opensiba kada tatlo ka bulan. Sa sining katuyuan, kinahanglan natigayon na ang hilikuton paniktik sa duha ukon tatlo ka posibleng target. Halin diri magapili kita

sang pinakamahapos nga target sangambus ukon reyde.

Ang rehiyunal nga mga kumand mahimo makatigayon sang kinaandan nga isa ka taktikal nga opensiba kada tatlo ka bulan paagi sa pag-areglo sang mga pwersa para sa ambus ukon reyde ukon paagi sa pagkoordinar sang mga opensiba nga himuon sa isa ka panahon sa mga prenteng gerilya sa idalum sang iya kumand. Sa ano pa man, indi kinahanglan ibutang sa katalagman sang ano man nga rehiyunal nga organisasyon sang hangaway ukon prenteng gerilya ang duha sa tatlo ukon masobra pa sang iya kabilugan nga armadong pwersa sa isa ka away.

Ang mga platon nga natalana sa hilikuton nga armadong propaganda ukon hilikuton pangmasa kinahanglan magtinguha sa paglunsar sang isa ka taktikal nga opensiba kada apat ka bulan. Mahimo ini nga mas masunson base sa mga nauna nga kadalag-an.

Ang mga taktikal nga opensiba kinahanglan sa masami desisyonan



**Kinahanglan naton  
dugangan ang aton  
organisadong baseng masa  
sang 30 tubtob 40  
porsyento kada tuig sa  
masunod nga tatlo ka tuig.  
Kinahanglan naton  
organisahan ang ginatos ka  
linibo nga pumuluyo sa  
tanang rehiyon**

kag tigayunon agud pabakuron ang armadong rebolusyon kag amo man sa paghatag inspirasyon sa pumuluyo nga mag-entra ukon magsuporta diri. Ang mga basehang taktikal nga opensiba kinahanglan tigayunon agud makakuha sang mga armas sang kaaway kag ang mga espesyal nga taktikal nga opensiba kinahanglan himuon sa basehan sang mga nagakaigo nga mandu sang isa ka hukmanan sang pumuluyo ukon sang nagakaigo nga awtoridad pangpulitika agud arestuhon o ukon makigsumpong sa mga tagalapas sang tawhanon nga kinamatarung, mga buyong kag traidor nga may utang nga dugo ukon may malala nga pagkuripon sa rebolusyonaryong pundo kag iban pa nga propyedad.

Kinahanglan husto nga ilatag naton ang hangaway sang banwa para sa pagpakig-away gerilya. Kinahanglan gamiton naton ang mga taktika sang konsentrasyon, dispersal kag pagsaylo nga may pleksibilidad. Kinahanglan naton magkonsentrar sang pwersa nga may ikasarang maglunsar sang taktikal nga opensiba. Kinahanglan idispers naton ang pwersa agud maghimo sang hilikuton pangmasa. Kinahanglan naton nga isaylo ang mga pwersa agud maglikaw sa opensiba sang mas superyor nga pwersa sang kaaway.

Kinahanglan naton magtukib sa obserbasyon kag paniktik ang mga kahigayunan para sa taktikal nga opensiba. Makahimo man kita magtuga sang amo nga mga oportunidad paagi sa pagduso sa kaaway nga maghimo sang mga sayup. Sa ano man ang sirkumstansya, kinahanglan naton planuhon kag maglunsar sang mga taktikal nga opensiba nga patud ang kadalag-an.

Trenta'y kwarto anyos sang armadong paghimakas ang nagtudlo sa aton sang madamo nga taktika agud lutuson ang kaaway kag disarmahan ang mga bahin sang armadong kusog sang kaaway. Mahimo naton salakayon ukon ambuson ang mga gamay nga yunit sang kaaway. Indi man naton masarangan salakayon ang daku nga kampo nga mabaskog ang depensa, mahimo man nga abangan naton nga magguwa ang iya gamay nga yunit kag magaagi sa aton lugar nga aton pagaambusan.

Mahimo naton papason ukon tublagon ang isa ka yunit sang kaaway gamit ang isa ka gamay naton nga pwersa sa isa ka lugar samtang nagamentenar kita sang isa ka mas daku nga pwersa nga nagahulat sa iban nga lugar agud ambuson ang reimporsment ukon yunit sang kaaway magausisa. Mahimo naton imentenar ukon palibutan ang isa ka erya gamit ang isa ka platun ukon kumpanya agud magtungod sang misyon sa sulod sang nasambit nga erya.

Pagkatapos magmadinalag-on kita sa pila ka taktikal nga opensiba sa isa ka erya, saligan naton ang kaaway magalunsar sang iya kontra-opensiba. Mahimo ini mangin malip-ot ukon magalawig. Mahimo naton likawan at tiyugan ang malip-ot nga opensiba sang kaaway. Kinahanglan naton magsaylo sa isa ka lugar kon ang opensiba sang kaaway magalawig kag malapad ang sakup.

Sa tion nga laptahon sang kaaway ang iya mga pwersa agud sakupon ang mas daku nga bahin sang teritoryo, mahimo makapili kita sang mahina nga bahin sa lugar man mismo para sa aton mga atake halin sa eksteryor nga linya ukon, ukon kon ginatugot sang mga kundisyon, sa likod sang

---

**Bangud sa may aton  
nga organisadong baseng  
masa nga ginapamunuan  
sang Partido, magamit  
naton ang mga polisiya kag  
taktika sa pakighiliugyon  
prente agud pukawon,  
organisahon kag  
mobilisahon ang pumuluyo  
sa minilyun-milyon sa  
pinakamadasig nga paagi.**

---



kaaway. Ang target mahimo isa ka gamay nga detatsment, nagapundo ukon nagahulag.

Mahimo padamuan sang BHB ang iya mga armas kag pataason ang lebel sang iya mga taktika kag teknika paagi lamang sa paglunsar kag pagdaog sang mga taktikal nga opensiba batuk sa mga pwersa sang kaaway. Sa pagdugang daku sang BHB, mapasanyog sang aton mga Pulang kumander kag hangaway ang ila ikasarang sa inaway kag mga armas kag magaengganyo sang bag-ong rekrut nga makahatag sang propesyunal kag teknikal nga kahanasan nga mapuslanon sa armadong rebolusyon.

Kinahanglan mangin mabinantayon kita sa armadong interbensyon sang US. Kinahanglan naton pangapinan ang pumuluyo sa tion nga ginalapakan sang mga tropa sang US ang pungsodnon nga soberanya kag ang teritoryo sang demokratikong gubyrno sang pumuluyo. Kinahanglan mangin

handa kita nga batuan ang pagsilabot kag agresyon militar sang US.

Kutob sa pagkalutos sa Indochina, nagmadinalag-on ang US sa pag-atake kag pagpukan sang mga dumuluong nga gubyrno gamit ang *high-tech* nga hinganiban kag mga taktikang *blitzkrieg* (madasigan kag makalilibot nga pagsalakay). Sining ulihi, gusto sang US nga gamiton ang Pilipinas bilang patag-awayan para sa pagtilaw kag pagpakita sang iya armadong kusog batuk sa isa ka rebolusyonaryong hublag nga nagasulong sang malawigan nga inaway banwa.

Agud batuan ang imperyalismong US, nagasalig kita sa aton pangkabilugang linya, estratehiya kag taktika kag sa aton manggaranon nga inagihan. Dugang pa diri, nagatuon-liwat kita sa mga madinalag-on nga rebolusyonaryong paghimakas sang mga kaupod kag pumuluyong Tsino, Koreano kag Vietnamese sa pagpaslaw sa interbensyon kag agresyon sang US.

Sa pagbatu sa kaaway, ang pangunahon nga polisiya naton amo ang pagpapas sa iya mga pwersa. Kadungan sini, may aton nga sekundaryong polisiya sang pagbungkag sa mga pwersa paagi nga ini kag pagbuyok sa ila nga maghalin sa bahin sang kaaway ukon magsaylo sa bahin sang rebolusyon. Kinahanglan may aton nga espesyal nga organo kag mga espesyal nga operatiba agud itanum ukon madebelopar ang mga patri-yotiko kag progresibong elemento sakubay sang reaksyunaryong hangaway kag pulis. Kinahanglan pauswagon naton ang isa ka demokratikong kahublagan sa sulod sang ila ranggo. Kinahanglan may aton nga



estrategikong paglantaw angot sa bagay nga ini.

Sa kahublagang masa, kinahanglan hatagan-tum-ok ang paglab-ot sa mga suldado sang reaksyunaryong hangaway kag sa ila mga pamilya. Kinahanglan makigbuligay kita sa mga biktima sang pagpang-abuso sang ila mga upisyal, kurapsyon kag paglapas sa tawhanon nga kinamatarung sa sulod sang reaksyunaryong hangaway kag pulis.

Kutob sa mahimo, kinahanglan naton nga nyutralisahon ang lokal nga pulis kag ang CAGU. Kinahanglan magpangita kita sang mga pamaagi agud dis-armahan sila nga wala ukon gamay ang matulo nga dugo. Pero sa kaso sang reaksyunaryong hangaway, gamiton naton ang tanan nga kinahanglanon nga taktika agud lutuson sila sa patag-awayan.

Ang mga nadakup nga kaaway nga suldado kag pulis, kinahanglan maayo ang pagtratar naton, tauron ang ila mga tawhanon nga kinamatarung kag hatagan sang makatawo nga tratasyon. Ginabilang naton sila nga mga bihag sang gera sigun sa Geneva Conventions kag mga protocol sini pati na ang sa GRP-NDFP Comprehensive Agreement on Respect for Human Rights and International Humanitarian Law.

Mahimo naton hilwayon sa gilayon ang mga ordinaryo nga suldado kag pulis. Kinahanglan naton ihunong ang mga upisyal sang kaaway tubtub magpasugot ang ila gubyrno at ang NDFP basehan nga mga pamaagi sang sigurado kag matalunsay nga paghilway.

### **Hilikuton pangmasa kag nagahiliugyong prente**

Kinahanglan naton pukawon, organisahon kag pahulagon ang

minilyun-milyon nga pumuluyo. Kinahanglan himuon naton ini paagi sa paglunsar sang mapisan nga hilikuton pangmasa kag solidong pag-organisa sa masa kag amo man sa paagi sa pagpakigbagay sa mga alyado, pasilhig nga propaganda pangmasang kag pagpahulag sa nabuyok nga masa sigun sa linya sang nagahiliugyong prente

Kinahanglan naton dugangan ang aton organisadong baseng masa sang 30 tubtub 40 porsyento kada tuig sa masunod nga tatlo ka tuig. Kinahanglan naton organisahon ang ginatos ka linibo nga pumuluyo sa tanan nga rehiyon. Kinahanglan abuton naton ang bag-o nga putuk-putukan sa solidong pag-organisa sang masa.

Kinahanglan naton tukuron ang komiteng pang-organisa sa baryo bilang paghanda sa rebolusyonaryong komite sa baryo, ang mga komite sa pag-organisa sa nanari-saring tipo sang organisasyong masa, ang mga organisasyong masa, ang milisya, ang mga yunit sa depensa sa



**Angkon ang mataas nga kumpyansa, magtinguha kita kag maghimakas agud pataason ang lebel sang inaway banwa kag agumon ang tanan-nga-bahin nga mga pag-abanse sa bag-o nga demokratikong rebolusyon.**

kaugalingon sang mga organisasyong masa kag ang mga sanga sang Partido sa mga puong-puong nga mga baryo kag banwa.

Ang kada iskward sang BHB kinahanglan magtukod sang 15 tubtub 20 ka grupong pang-organisa kada bulan. Ang mga grupong pang-organisa kinahanglan mapauswag sa mga lubos nga organisasyong masa sa sulod sang isa ka tuig kag ang mga komiteng pang-organisa mangin lubos nga mga organisasyong masa sa sulod sang anum ka bulan.

Kinahanglan magtinguha kita nga mamentenar ang 3 sa 1 nga relasyon sa ekspansyon kag konsolidasyon. Sa pagplano sang aton hilikuton sa erya, kinahanglan timbangon naton kon bala ang lugar makahatag bastante nga lugar sa pagmaniobra kag paborable nga tereyn. Mangin mas madasig ang pag-organisa sang masa sa mga baryo kon sa diin may daan na kita nga hilikuton kon malubad ang mga problema napilitan kita maghalin sa erya.

Kinahanglan tukuron naton ang komiteng pang-organisa sa baryo<sup>14</sup> kag madamu pa nga posibleng komiteng pang-organisa sang nanari-saring tipo sang organisasyong masa agud masakup ang bilog nga baryo kag maangutan ang tanan nga demokratiko kag mga progresibong pwersa. Ang komiteng rebolusyonaryo sa baryo nagatindog bilang organo sang gubyrno sang pumuluyo nga ginapili sang mga tiglawas sang mga organisasyong masa ukon, kon ginatugot sang sitwasyon, direkta nga tukuron sang pumuluyo sa baryo.

Kinahanglan naton tukuron ang mga komite sa munisipyo sa ano man nga tipo sang organisasyong masa kon ang amo nga organisasyong masa

naorganisa na sa 15 tuhtub 20 ka baryo sa isa ka banwa. Sa palaabuton, mahimo dumeretso kita sa pagtukod sang mga komite sa lebel sang distrito kag prubinsya.

Ang mga organisasyong masa kinahanglan maglunsar sang mga kampanya agud pahulagon ang pumuluyo para sa ila kaugalingon nga benepisyo kag ilatag ang basehan para sa dugang nga rekrutment kag dugang nga pagpahulag.

Kinahanglan makigbuligay ang mga armadong yunit pangpropaganda sa mga organisasyong masa agud ilunsar sang malaparan nga edukasyon pangpulitika.

Kinahanglan maghanas sang mas madamu nga mga instruktur halin sa masa. Kinahanglan buyukon sila nga matinugahon nga gamiton tanan nga epektibo nga pamaagi kag sangkap sang edukasyon.

Kinahanglan palaparon kag papagsikon ang antipyudal nga paghimakas. Kinahanglan isulong ang minimum nga programa sa reporma sa duta. Buyukon ang mga asosasyon sang mga mangunguma isulong ang kampanya sa pagpanubo sang renta sa duta, ipanubo interes sa pautang, pataason ang suhol sang mga mamumugon sa uma, pataason presyo sang produktong agrikultural at pataason kag saydlayn nga trabaho.

Kinahanglan naton pamatukan ang pagbalik sa duta sang mga agalon nga mayduta, mga paltik nga kooperatiba, ang reklasipikasyon sang duta kag

pananum, "globalisasyon" sa agrikultura, usurero komersyante, nanari-saring tipo sang pag-agaw sa duta kag iban pa. Ang reaksyunaryong gubyerno kinahanglan tapnaon sa pagkuha sang duta nga ginhatag sadto ukon ginahulug-hulugan sang mga agsador.

Kinahanglan maghimo kita sang iban pa nga kampanyang masa nga may angot sa masunod: edukasyon pangpulitika, organisasyon, produksyon, ikaayong lawas, literasiya, kultura, paghanas sa kaugalingon nga depensa, tawhanon nga kinamatarung, paghanda batuk sa natural kag tuga-sang-tawo nga kalamidad kag iban pa. Kinahanglan dal-on naton sa kaumhan ang kon ano nga kahanasan kag bulig nga makuha halin sa kasyudaran.

Kinahanglan palig-unon naton ang alyansa sang mamumugon kag mangunguma bilang basehan sang nagahiliugyong prente para sa armadong rebolusyon. Ang Partido kag ang BHB magsandig sa mga imol nga mangunguma kag mamumugon sa uma, ginabig ang mga nahanunga nga mangunguma, ginanyutralisa ang mga manggaranon nga mangunguma kag ginahingalitan ang bentaha sang mga kontradiksyon sa tunga sang mga nasanagan kag despotiko nga agalon nga mayduta agud ihamulag kag waskon ang gahum sang naulihi.

Dugang pa, kinahanglan pauswagon naton ang alyansa sang mga progresibong pwersa sa mga petiburgesya sa syudad,

ang alyansa sang mga patriyotikong pwersa sa nahanunga nga burgesya kag ang mahuyang nga alyansa sa mga bahin sang reaksyunaryong sahi batuk sa kaaway.

Bangud sa may aton nga organisadong baseng masa nga ginapamunuan sang Partido, magamit naton ang mga polisiya kag taktika sa pakighiliugyong prente agud pukawon, organisahon kag mobilisahon ang pumuluyo sa minilyun-milyon sa pinakamadasig nga paagi. Sa sini, pinakaepektibo nga makoordina naton ang mga pwersa kag pumuluyo sa kasyudaran kag sa kaumhan.

Kinahanglan paluntaron naton ang pagbuligay kag mutwal nga pagsuporta sa tunga sang kaumhan kag kasyudaran. Kag kinahanglan gamiton sa pinakaepektibo nga paagi ang legal, semilegal kag ilegal nga porma sang organisasyon kag paghimakas para sa katuyuan sang ekspansyon kag konsolidasyon.

Angkon ang mataas nga kumpyansa, magtinguha kita kag maghimakas agud pataason ang lebel sang inaway banwa kag agumon ang tanan-nga-bahin nga mga pag-abanse sa bag-o nga demokratikong rebolusyon. Abuton naton ang mga target sang Tatlo ka Tuig nga Plano kag agumon ang daku nga kadalag-an sa masunod nga tatlo ka tuig. Ihatag naton ang tanan nga ikasarang sa pagsulong sang pangkalibutanon nga proletaryong rebolusyon kag sang malapad nga kahublagan anti-imperyalista. AB

## Mga Nota:

<sup>1</sup>Sa kasaysayan sang sistemang kapitalista, ang mataas nga empleyo nagaresulta sa masami sang pagtaas sa sweldo bangud ang mataas nga demanda para sa mga mamumugon nagapahamtang sa ila sa maayo nga sitwasyon nga ipamilit ang dugang nga sweldo. (pahina 5)

<sup>2</sup>Sa balaligyaan sang mga sapi sa US, mahimo makabakal sang mga sapi paagi sa "on margin" ukon paagi sa utang nga may kolateral nga ginagarantiyahan nga igadeposito sang mga stock broker. Ang nagabakal "on margin" mahimo makautang sang duha tubtub apat nga pilo sa balor sang ila kolateral agud magamit sa pagbakal sang mga sapi sa paagi sang pareho nga stock broker. Kon magtibusok ang presyo sang mga sapi sang mas manubo pa sangsa balor sang utang, mahimo ibaligya na sang stock broker ang mga sapi, kumpiskahon ang kantidad sini kag pati ang kolateral tubtub ang kantidad sang utang, kag manukot pa sang interes sa utang. (pahina 5)

<sup>3</sup>Consumer demand ukon kabilugan nga kantidad nga mahimo baklon sang mga manugbakal base sa ila ikasarang magbakal. (pahina 5)

<sup>4</sup>Ang "salient points of control" amo ang mga malahalon nga patag ukon teritoryo nga kon makontrol nagahatag sa isa ka bahin sa kumplikto sang paborable nga pusisyon agud halin diri makontrol ukon maimpluwensyahan ang iban nga mas malapad ukon mas estratehikong patag ukon teritoryo. Sa sini nga kahulugan, ang pagpusisyon sang US sa Iraq nagahatag sa US sang "salient point of control" pasulod sa kabilugan sang Middle East. (pahina 6)

<sup>5</sup>Ang cluster bomb isa ka daku nga bomba nga nagaunod sang pila ka gatos (nagaabot sang 200-600) nga magagmay nga bomba (bomblet), nga nagawasaag sa malapad nga kalupaan kag nagahatag sang malapad nga kasamaran. Ang tuyo sini amo magpatay kag magsamad sang madamo sa matawo nga lugar. Ginademanda sang mga nagasakdag sang tawhanon nga kinamatarung kag makatawo nga gera nga ideklarar nga iligal nga armas para sa madamuan nga pagpamanad ang cluster bomb. (pahina 6)

<sup>6</sup>Mga modernong bomba nga ginakontrol sang mga kompyuter agud tuytuyan ang paghulog sini pakadto sa isa ka tuyo nga target. Bisan ano nga pagpabugal sang US nga direkta ini nagaigo sa mga target, 15-20% sang mga bomba nga ini sang US ang nagapaltos nga resulta sa masami sa pagkamatay sang mga sibilyan kag pagkaguba sang mga sibilyan nga imprastruktura. (pahina 6)

<sup>7</sup>Ang depleted uranium amo ang uranium nga ginkuhaan sang bahin nga ginausar nga basehang sangkap sa paghimo sang mga armas nukleyar. Isa ini ka labing mabug-at (high density) nga metal nga ginagamit nga materyal sa mga hinganiban nga pangguba sang mga tangke kag iban pa nga salakyan panggera. Suno sa US, indi na peligroso sa tawo ang depleted uranium bangud tama kahina na ang matuga sini nga radiation. Pero may mga report sang makahalalit nga epekto sini sa ikaayong lawas lunsay sa mga suldado nga nagagamit sang amo nga hinganiban kag sa mga ginagamitan sini, kag labaw sa tanan, sa mga pumuluyo sang mga pungsod nga gingera sang US sa nagligad. (pahina 6)

<sup>8</sup>fratricidal -pagpatyanay sang magkasimanwa. (pahina 6)

<sup>9</sup>Ang embargo amo ang pagpugong sa pagsulod-guwa sang mga produkto kag mga salakyan nga nagadala sang mga ini agud ipiton ang ekonomya sang pungsod kag paluhuron ini sa gahum sang nagdeklarar sang embargo. (pahina 6)

<sup>10</sup>Ang Danube ang ikaduha nga pinakamahaba nga suba sa Europe. Nagahalin sa Germany pasidlangan tubtub sa baybayon sang Black Sea sa Romania. Ang Rhine naman isa sa mga pangunahon nga suba sa Europe. Nagahalin ini sa sidlangan sang Switzerland kag nagaagi sa Austria, Liechtenstein, France, Germany, kag Netherlands pakadto sa North Sea. (pahina 7)

<sup>11</sup>Umpisa Nobyembre 2000, Euro na imbes dolyar sang US ang ginabaton sang Iraq sa ginabaligya sini nga langis. Tuyo sang tikang nga ini sang Iraq nga makaguwa sa kontrol sang dolyar sang US kag pahinaon man ini bilang kwarta nga ginagamit agud makontrol sang US ang negosyo sa langis. (pahina 7)

<sup>12</sup>Sobra-sobra nga kagamhanan. (pahina 7)

<sup>13</sup>Mahimo magdesisyon ang senado kag kongreso nga magtingub kag magpulong bilang isa ka constituent assembly nga may gahum nga bag-uhon ang konstitusyon. Lain ini sa isa ka constitutional convention (concon) nga isa ka asembliya nga ginpili sang isa ka pangkabilugan nga eleksyon. (pahina 11)

<sup>14</sup>Ang nakasaad diri nga Komiteng Pang-organisa sang Baryo ang ginatawag naton subong nga Komiteng Pang-organisa ng Mamamayan sa Baryo (KPMB). Mahimo tukuron ini bilang paghanda para sa KRB sa kahimtangan indi pa pwede matukod ini sa gilayon. Ginalain natin ang KPMB sa KPB sadtong maaga nga bahin sang dekada 1970 nga wala nakabase sa basehang pag-organisa sa masa. (pahina 17)